

10 October. 2025 .18:15 Hrs

Headlines

- प्रधानमंत्री नरेंद्र मोदी होर कल नमी दिल्ली च द'ऊं बड्डी पहलकदमियें दा शुभारम्भ करडन जिंदे च पी.एम धन धान्य योजना ते दालें दे उत्पादन च आत्मनिर्भरता हासल करने सरबन्धी मिशन शामिल ऐ।
- अज्ज दुनिया भरै च मानसिक सेहत सरबन्धी कुल संसारी ध्याड़ा मनाया जा'रदा ऐ। प्रधानमंत्री मोदी होरें सबनें गी गुजारश कीती ऐ जे ओहू किट्टे रलियै ऐसा साज़गार म्हौल तैयार करन जित्थे मानसिक सेहत बारै गल्लबात बड्डी प्रमुखता कन्नै कीती जा।
- सर्वोच्च अदालतै जम्मू-कश्मीर दा राज्य दा दर्जा बहाल करने दी मंग आहली याचिकाएं पर प्रतिक्रिया देने लेई केंद्र सरकार गी च'ऊं हफ्ते दा समां दित्ता ऐ।
- श्रीनगर पुलसै, आतंकवादी गुटें कन्नै जुड़े दे 21 ओवरग्राउंड वर्करें दे घरे पर छापे मारे न।
- पुलस ने बन्ना टप्पियै पाकिस्तान नस्सी गेदे इक आतंकवादी दी रामबन जिले च मजूद जिमीं गी कुर्क करी लैता ऐ।

<><><><><><><><>

PM-Dhan Dhanya Yojana

प्रधानमंत्री नरेंद्र मोदी होर कल नमी दिल्ली च द'ऊं बड्डी पहलकदमियें दा शुभारम्भ करडन जिंदे च पी.एम धन धान्य योजना ते दालें दे उत्पादन सरबन्धी मिशन च आत्मनिर्भरता शामिल ऐ। राई बाई मंत्रालय नै आखेआ ऐ जे पी.एम धन धान्य कृषि योजना दे तैहत मुख्य भरै च घट्ट उत्पादन आहले 100 जिलें चा राईबाई खेत्तर दा पूरा-पराता विकास यकीनी बनाया जाग ते एहदा मकसद करसानें दी औंदन च खरा-मता बाढ़ा करना ऐ। इस स्कीम दे तैहत हर इक खेत्तर तोड़ी सिंचाई दी सुविधा यकीनी बनाने, बन-सबन्नी फसलां राहने दे कम्मा गी बढ़ावा देना

ते दोआर-कर्जे ते भण्डारण ढांचे तोडी करसानें गी सखल्ली पुज्ज उपलब्ध करोआने दा लक्ष्य मिथेआ गेदा ऐ। दुई बक्खी दालीं सरबंधी मिशन च आत्मनिर्भरता हासल करने दे अभियान तैहत मुख दालें दे उत्पादन च बाहे बक्खी ध्यान केंद्रित कीता जाग। इस मिशन तैहत केंद्री एजेंसियां पंजीकृत करसानें थमां 100 फीसद उत्पादें दी घटोघट समर्थन मुल्ल पर खुश-खरीद करडन जेदे नै अन्नदाता करसानें गी बड़ा मता फायदा यकीनी बनोग।

<><><><><><>

World Mental Health Day

अज्ज दुनिया भरै च मानसिक सेहत सरबंधी कुल संसारी ध्याड़ा मनाया जा'रदा ऐ। एहदा मकसद मानसिक सेहत सरबंधी मामलें बारै जागरूकता पैदा करना ते दुनिया भरै च मानसिक दिक्खभाल दे कम्में च जारी जत्तें गी बल देना बी ऐ। प्रधानमंत्री नरेंद्र मोदी होरें लोकें गी गुजारश कीती ऐ जे ओहू किट्टे रलियै कम्म करन ते ऐसे म्हाँल दा निर्माण करन जित्थे मानसिक सेहत बारै गल्लबात बड़ी प्रमुखता कन्नै कीती जा। सोशल मीडिया दी इक पोस्ट च श्री मोदी होरें आखेआ ऐ जे मानसिक सेहत सरबंधी कुल संसारी ध्याड़ा असें सब्बनें गी बड़े असरदार ढंगै नै एहू गल्ल चेत्ता करांदा ऐ जे सब्बनें दे कल्याण ते आरोग्य लेई खरी मानसिक सेहत बड़ा महत्वपूर्ण हिस्सा ऐ। उनें आखेआ जे एहू ध्याड़ा होरनें दे प्रति दया-भावना प्रगट करने दे महत्व गी बी दर्शांदा ऐ।

<><><><><><>

Mental Health Day

उधमपुर दे सरकारी मेडिकल कॉलेज च “मानवतावादी इमरजेंसी स्थितियों च मानसिक सेहत” विशे कन्नै विश्व मानसिक दिवस 2025 मनाया गेआ। इस मौके पर जीएमसी उधमपुर दे एम.बी.बी.एस दे विद्यार्थियों ते डाक्टरें आसेआ प्रभावशाली रैली कडुि गेई। एहू रैली जीएसमसी उधमपुर परिसर थमां शुरू होई ते शैह्ला दे बक्ख-बक्ख चौकें-बजारें थमां लंगदे होई वापस जीएमसी उधमपुर च आइयै सम्पन्न होई। विद्यार्थियों आम लोकें गी जागरूक करने आस्तै हत्थें च तख्तियां, पोस्टर फगड़े दे हे। इस सामूहिक प्रयास दा मकसद लोकें दी भलाई आस्तै मानसिक सेहत दी महत्वपूर्ण भूमिका गी पंछानना हा। आकाशवाणी खबरें कन्नै गल्लबात करदे होई जीएमसी उधमपुर दी फिजियोथेरेपिस्ट डॉ. अमृता ठाकुर होरें आखेआ।

<><><><><><>

Interactive Session (byte)

भारती फौज ते जम्मू-कश्मीर पुलस आसेआ राजौरी दे थन्नामंडी आहले सरकारी डिग्री कालेज दे सहयोग कन्नै अज्ज मानसिक सेहत सरबन्धी कुल संसारी ध्याडे दे मौके पर गल्लबात आहले इक्क कार्यक्रम दा आयोजन कीता गेआ। एहदा मकसद खरी मानसिक सेहत ते कनून बश्कार रिश्ते दे महत्व पर लौऽ पाना हा। इस मौके पर फौज ते पुलस दे अधिकारिएं खरी मानसिक सेहत दे महत्व पर लौऽ पाई ते आखेआ जे कुदरती क्रोपिएं, तनोतनी ते सेहत सरबन्धी आपात स्थिति दे दरान मानसिक सेहत दा महत्व होर बी बधी जंदा ऐ। इस मौके पर बोलदे होई सरकारी डिग्री कॉलेज दे प्रिंसीपल फारूक अहमद होरें आखेआ

<><><><><><>

SC J&K Statehood

सर्वोच्च अदालत केंद्र शासित प्रदेश जम्मू-कश्मीर दा राज्य दा दर्जा बहाल करने दी मंग आहली याचिकाएं पर प्रतिक्रिया देने लेई केंद्र सरकार गी च'ऊं हफ्तें दा समां दित्ता ऐ। प्रधान न्यायाधीश बी.आर गवई ते जस्टिस के. विनोद चंद्रन हुं'दी शमूलियत आहली इक्क बेंच इनें याचिकाएं पर सुनाई करा'रदी ही जिंदे च तौले शा तौले जम्मू-कश्मीर दा राज्य दा दर्जा बहाल करने दे केंद्र सरकार दे आश्वासन गी अमल च आहनने दी मंग कीती गेदी ऐ। केंद्र सरकार दी तरफा पेश होए दे सालीसीटर जनरल तुषार महता होरें सर्वोच्च अदालत गी दस्सेआ जे जम्मू-कश्मीर च खरी मती प्रगति हासल कीती गेदी ऐ। महता होरें इब्बी आखेआ जे जम्मू-कश्मीर च पिछले ब'रे पूरी रमानदारी कन्नै असेंबली दे चुनांऽ करवाए गए ते सर्वोच्च अदालत दी संवैधानिक पीठ कन्नै कीते गेदे वायदे मुजब जम्मू-कश्मीर च हुन इक्क चुनी दी सरकार अपना कम्मकाज चला करदी ऐ।

<><><><><><>

CS Milk Production

मुख्य सचिव अटल डुल्लु होरें कृषि उत्पादन मैहकमे दी उच्च स्तरीय बैठक दी अध्यक्षता करदे होई केन्द्र शासित प्रदेश च दुध ते मटन उत्पादन गी बढ़ावा देने लेई चुक्की गेदी गैं दी समीक्षा कीती। मुख्य सचिव होरें इनें सैक्टरें दी

तरक्की, मूल्य वृद्धि ते उद्यमिता आस्तै बेहतरीन क्षमताएं गी उजागर कीता। डुल्लु होरें मकामी उद्यमियें गी आखेया जे ओ डेयरी ते पशुधन क्षेत्रें च फैयदा लैन तां जे टिकाऊ आजीविका पैदा कीती जाई सके ते बधदी मंग गी बी पूरा कीता जाई सकै।

<><><><><><>

Police Raids OGW's

श्रीनगर पुलस नै अज्ज पूरे शैह्वा दे केई थाहें पर छापेमारी कीती ते प्रतिबंधित आतंकवादी संगठनें कन्नै जुड़े दे आतंकवादियें दे सहयोगियें ते उन्दे लेई कम्म करने आहले ओवर ग्राउंड वर्करें दे अवासें गी नशाना बनाया। पुलस प्रवक्ता नै इक बयानै च आखेआ ऐ जे शैह्वा दे बक्ख-बक्ख थाहें पर छापेमारी कीती गेई। श्रीनगर पुलस नै गैर कनूनी गतिविधियें सरबन्धी अधिनियम दे तैहत चला'रदी जांच दे सिलसिले च प्रतिबंधित आतंकवादी संगठनें कन्नै जुड़े दे आतंकवादियें दे सहयोगियें ते सक्रिय कार्यकर्ताएं दे अवासें पर बड़ी छापेमारी कीती। एग्जीक्यूटिव मैजिस्ट्रेटें ते गवाहें दी मौजूदगी च बड़ी कनूनी प्रक्रिया दे तैहत 21एं लोकें दे घरें दी तपाशी लैती गेई।

<><><><><><>

Properly Attached

पुलस नै रामबन जिले च इक पाकिस्तान स्थित आतंकवादी दी राई-बाई आहली जिमी गी कुर्क करी दित्ता ऐ। आकाशवाणी जम्मू दे संवाददाता नै दस्सेआ ऐ जे दुमकी सुम्बर च 4.11 कनाल जिमीं फारूक अहमद उर्फ आबिद दी ऐ जिसी गैर कनूनी गतिविधियें अधिनियम दी धारा 25 तैहत कुर्क कीता गेआ ऐ। कनूनी प्रक्रिया दी पालमा करदे होई संपत्ति गी अधिकारिक राजस्व रिकार्डें च दर्ज कीता गेआ ऐ कनूनी मानदंडें दी पालमा करदे होई एग्जीक्यूटिव मजिस्ट्रेटन ते होरनें अधिकारिक गहवों दी मौजूदगी च एहू संपत्ति कुर्क कीती गेई ऐ।

<><><><><><>

Poshan Mah (byte)

बच्चें ते उंदी मावरी च खुराक दे पैमाने च सुधार सरबन्धी पोषण माह अभियान जम्मू-कश्मीर दे सबनें जिले च मते जोश ते निष्ठा कन्नै मनाया जा'रदा ऐ। इस्सै सिलसिले तैहत रामबन जिले च विशेष जागरूकता कैंप लोआए जा

करदे न जिंदे च मुख तौरा पर ध्यान किशोर उम्री दिएं बच्चिएं, पटेयाली महिलाएं, 6 ब'रें तोड़ी दी उम्री दे बच्चें ते बच्चें गी दुध पलेयाने आहली मावरीं दी खुराक पर दिता जा'रदा ऐ। इनें कैपें दरान प्रतिभागी मुफ्त सेहत जांच, आर्युवेद बारै सलाह-मिश्वरा ते दवाइयें सरबंधी मदाद मुफ्त हासल करा करदे न। इस पहलकदमी दी सराहना करदे होई इक आंगनवाड़ी वर्करें नै आखेआ .

<><><><><><>

Farm Training

स्कॉस्ट जम्मू ते कृषि विज्ञान केंद्र किश्तवाड़ आसेआ किश्तवाड़ जिले च कुदरती राई-बाई सरबंधी राष्ट्री मिशन दे तैहत पंजीकृत करसानें लेई सिखलाई कार्यक्रम दा आयोजन कीता गेआ ऐ। जानकारी मताबक कृषि विज्ञान केंद्र किश्तवाड़ सी.ए.ओ किश्तवाड़ ते 38 कृषि साक्षियें दे सांझे जत्तें कन्नै 19 केंद्रें च सिखलाई दिती जाहग। कुदरती राई-बाई दे नोडल अफसर डॉक्टर अमितेष शर्मा होरें चिंगम केंद्र दे करसानें च इस सिखलाई दा आयोजन करोआया। इस सिखलाई कार्यक्रम च 50 थमां बद्द करसानें ते महिलाएं हिस्सा लैता जेह्दे च उ'नेंगी राईबाई सरबंधी वैज्ञानिक तौर-तरीकें ते कुदरती राई-बाई सरबंधी तौर तरीकें बारै जागरूक बनाया गेआ। इस मौके पर डॉक्टर अमितेष होरें गलाया।

<><><><><><>